

Erich Bolinius

www.erichbolinius.de

Erich.Bolinus@t-online.de

**Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 4.10.2012 18.05 Uhr** auf 94.0 bzw. 87,7

Leev Toehörers,

lesd Wekenenn hett Kickers Emden in **Brake** mit 2:4 up de na Menen van Kickers schwaar bespölbaare Kunstrasenplatz verloren. „Dat is ´n Frechheit, mit Foetballspölen hett dat neet völ toedaan. Dat is so, as wenn man up ´n grön Teppich spölt“, klaagte Trainer Yasin Turan na dat Spöl.

So heel kann ik hum neet verstaan. Ik hebb ok al faaker up Kunstrasen spölt, dat lesd Maal lesd Jahr in Haugesund in Norwegen. Un ik – un ok mien Mannskupp – sünd dormit goed toerecht komen. Also, dor hett dat seker neet an legen, dat Kickers in Brake unnergahn is. Da lag ok doran, dat de Trainer glik 5 Spölers neet insetten kunn.

Kickers wull na de moi Sieg mit 2:0 tegen Papenbörg anknüppen, man al na tein Menüten mussten se ´n Tor hennehmen. Seß Menüten later klingelte dat al weer in Tor van Kickers.

Dorna kwamm Kickers beter in ´t Spöl, man Tuitjer vergaff twee dicke Kansen. Twee Torwartfehler van Caarstens föhrten dann toe ´n 4:0 för Brake. Dorna wesselte Turan twee Spölers ut. Un dorna wurr Kickers weer beter un kwamm dör Gökay Batbay, dör ´n Elfmeter, un Sebastian Bloem in de 84. Menüte noch toe 2 Toren, man de kwammen toe laat.

Güstern in **Oldenbörg**, de de 2. Mannskupp van VFB Oldenbörg, sach de Welt al weer beter ut. Trainer Turan kunn up eenige Spölers, de in Brake noch fehlten, weer toerügg griepen. So kunn Thilko Boekhoff doch mitspölen un de Innenverteidiger Milad Faqiryar un Bernd Grotluschen, de kwamm in de 60. Menüte, kunnen insett worden.

Kickers stunn in Oldenbörg van Anfang an achtern beter as in Brake. Glück harr Kickers allerdings in de 20. Menüte, as ´n Querschläger van Manuel Menzel unner de Torlatt van de Torstreek weer in dat Spölfeld sprung. De Emder wull de Ball na Ecke klären, un dat is goed gahn, wenn ok up ´n bietje raar Aard un Wies.

Kickers was defensiv instellt, wat sük tegen de spölstarke Oldenbörger utbetahlen sullte. De Emder Ofwehrkett un Torwart René Carstens stunnen immer goed. Na ´n Flank van Ayaovi Bamezon köppte Bloem de Ball in de 35. Menüte in ´t Tor van Oldenbörg. Dat gaff Sekerheid för Kickers Emden. De van de A-Joegd utlehnte Tido Steffens, de alleen as Spitze spölte, skoot in de 60. Menüte, he spölte twee Tegenspölers un ok noch de Torwart ut, dat tweede Tor för Kickers. Un dorna kwamm Bernd Grotluschen weer na eenige Weken Twangspaus toe sien Insatz. Kört vör Enn harr Thilko Boekhoff bold noch dat dart Tor för Kickers skoten. Man sie Heber gung knapp an ´t Tor vörbi.

Mit disse Sieg hett Kickers sük in de Landesliga in de bobere Tabellenhälfte fastsett, un is dormit de beste oostfreeske Mannskupp. Man kann blot hopen, dat de anner oostfreeske Mannskuppen ok bold maal weer Spölen winnen. Man dat bruukt ja neet jüst tegen Kickers Emden wesen.

Saterdag um Klock 6 geiht dat nu in ´t Oostfreeslandstadion gegen de SC Spelle-Veenhuus. De stahn boben Kickers Emden. Word seker ´n swaar Spöl.

Was moi, wenn ´n Bült Toekiekers kwammen, um Kickers antoefüren. De jung Kickersmannskupp hett dat verdeent, meen ik.

So, nu as alltied, noch ´n kört Foetballwitz:

Ik bün vör twee Daag van ´n Schottlandreis mit mien Ü60-Mannskupp van SV Petkum toerügg komen. Een ofmaakte Spöl in Schottland kunn neet dörföhrt worden. Of de Grund dorför ok disse was, weet ik neet..

Ik hebb hört, as een Schotte tegen sien Kumpel see: „Stell di vör, güstern is wahrhaftig uns Foetballverein uplöst worden, dorbi besteiht de siet nu fast 30 Jahr.“ „Wieso, gaff dat Arger?“, fraggt de Kumpel na. „Egentlik neet. Wi hebben blot uns Ball verloren.“

Leev Toehörers van Radio Oostfreesland,
dat was dat weer maal för disse Week.

Ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius
ut Emden-Petjem.